

Thursday, May 22, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

CM

NITI Aayog Governing Council leh Raising NE: Investors Summit 2025, tel tur leh sawrkar laipui hruiute dawr turin Chief Minister Pu Lalduhoma chuan vawiin khan New Delhi a pan.

Chief Minister Office atanga thudawn danin Chief Minister hian vawiin khan New Delhi a pan a, hetah hian Commissioner & Secretary to CM Pu Vanlaldina Fanai bakah sawrkar mi pawimawh dang ten an tawiawm a, NITI Aayog Governing Council leh Raising NE: Investors Summit 2025 ah a tel dawn bakah sawrkar laipui hruiute a dawr dawn a ni.

NITI Aayog hi Union Cabinet in kum 2015 a a din a ni a. Prime Minister chu Chairman niin state leh UTs zawng zawng Chief Minister te chu member an ni. NITI Aayog bultum hian Viksit Bharat 2047 kalpui mek a ni a. Kum 2047 hmaa India ram chu ram changkang a hlankai tumna a ni.



AMRIT STATIONS

Prime Minister Narendra Modia chuan vawiin khan ram chhung hmun 103 ah Amrit Bharat Station a hawng.

Prime Minister hian Rajasthan-a Bikaner a tlawhna ah heng station hrang hrang te hi a hawng a, Amrit Bharat Station Scheme hnuaiah Deshnok Railway Station siam thar a hawn bakah Bikaner- Mumbai rel tlan tur a vailiam bawk.

Prime Minister in a hawn heng station te hi tunlai changkanna mila thuam an ni a. Prime Minister Modia chuan social media lamah he thu hi sawiin Amrit Station hawn tur chu rela zin veivahna kawngah hmasawna ruhrel thar pawimawh tak an ni dawn tih a sawi a. Zinmite tana hmun nuam, inkalpawhna tha leh hnam ziarang hlu tak chhawmnun zelna tur a ni a ti.

Rampumah Amrit Bharat Station Scheme hnuaiah hian rel station 1300 chuang thawmthat a tihchangtlun a ni a. Chung zinga 103 chu vawiinah hian hawn an ni.



TRUCKERS

Mizoram Truck Owners Association leh Mizoram Truck Drivers Association ngenna angin naktuk hian Buichali leh Sairang inkar kawng chhe zual lai hnawh that hna Contractor ten an thawk tan dawn a, Truck khalhtu leh neitute sawi danin kawng chhe zual lai siamthata tlan ngam anih chuan an tlan chhonzawm dawn tih an sawi.

Mizoram Truck Owners Association hotute sawi danin nimina PWD Minister Pu Vanlalhlana hova Buichali leh Sairang inkara kawng chhe zual lai an enfiahna ah Contractor te chu kawng chhe zual lai thawm that hna thawk turin an ngen a, an ngenna angin Contractor ten thawh an inhuam angin naktuk atang hian an thawk tan dawn a, truck neitu leh khalhtute hian naktuk chawhnu dar 2 ah kawng chhe zual lai an thawm that hi an enfiah tur thu leh an duh ang anih chuan an tlan chhonzawm dawn tih an sawi a ni.

MTOA Secretary Pu Dina Tlau chuan Truck neituten chak zawka kawngpui siam a nih theih nan kawng siam chung, zing dar 9 atanga tlai dar 5 thleng lirthei din tir an inhuam thu an sawi bawk a ni.

Byte... MTOA Secretary Pu Dina Tlau

Nimin khan PWD Minister Pu Vanlalhlana chuan Buichali leh Sairang inkara kawng chhe zual lai an enfiahna ah National Highway 06 chu Mizoram chak lakna kawngpui pawimawh berte zinga mi a nih angin, engtik lai pawha lirthei zawh tlaka siam a tul thu a sawi a, NHIDCL hotute chu mipui, a bikin lirthei hmanga eizawngten harsatna an tawh dante hrilhfiain, tun aia chak lehzuala kawng siam hna kalpui turin a chah a ni.



STATE MUSEUM

Mizoram state Museum enkawltuten Museum a dah chi hnam rohlu neite chu ti riral mai lovin, mipuite hmuh theih turin Museum a dah zel turin an sawm.

International Museum day puala Akashvani Aizawl, Regional news unit-in a kawmnaah, Mizoram State Museum Curator Pu C. Lalruatfela chuan tun dinhmunah Mizoram State Museum-ah thil chi hrang hrang 789 pho chhuah mek a ni a ti a. Phochhuah tur dah that 3218 a awm mek tih sawiin a vaiin thil dahthat 3950 a awm mek an ti a, Museum a dah chi hnam rohlu neite chuan paih bo emaw ti riral mai lovin Mizo zawng zawngte tana rohlu chhenfakawm, mipuiten an hmuh theih turin mahni inbengvara Mizoram state Museum a dah zel turin a sawm a, zirlaite leh thangthar te tana Museum a dahthat chu intihhmuh zel turin a chah a ni.

Byte: Museum Curator

Pu Ruatfela chuan Museum chu Mizo hnam nun phochhuahna a nih avangin ram pawn atangin a tlawhtu an pung chho mek a ti a, Mizote chuan hnam angin Museum ngaihhlut nachang an hre thin lo tih sawiin tunhma chuan Museum chu thil hlui leh thil mak dahkhawmnaah an ngai thin a, kum engmawti atang khan thangtharte chuan Museum pawimawhna an lo hre chho zel a, hnamzia leh nihphung hriat theihna hmunpui ber a ni chho a ti a, tunlai

thangtharte leh zirlaiten ngaihhlut nachang an hria chu lawmawm a tih thu sawiin Mizoram State Museum chu hmun lailia taka awm a nih avangin khualzin tlawhtu an ngah a, tlawh tu zingah hnamdang chu a tam pawl an nih thin thu sawiin, research scholar te leh zirlai dangten an zirna kaihhnawihah Museum chu an hmang tangkai hle tih a sawi bawk a ni.

International Museum Day hi kumtin May ni 18 ah hman thin a ni a, kuminah erawh Pathianniah a tlak avangin Mizoramah chuan May ni 16 Zirtawpni khan hman a ni a, International Museum day pual hian a thlawnin mipui tlawh theih turin Museum hawn a ni a. Kumina an thupui chu “The Future of Museums in Rapidly Changing Communities,” tih niin, a kawh tum ber chu tunlai khawvel changkanna thang chak tak karah kan hnam nihphung kawhhuhtu chanvo pawimawih tak chu Museum kuta awm mek a nih thu Museum Curator chuan a sawi.

